

In graciis de colaborazion fra ARLeF e Union europeane

# Europass: il furlan al jentre intal curriculum uficiâl european

**L**a cognossince ancje de lenghe furlane tant che arme moderne in plui par cjatâ lavôr e par pontâ ae assunzion: e je une oportunitât che cumò si pues vê compilant il curriculum vitae european gjestît de Direzion Istruzion e Culture de Union europeane midiant Europass. Chest sisteme, nassût intal 2012, al à uniformade la compilazion dai curricula par cui che al cîr lavôr o che al vûl promovî lis sôs competencis scolastichis e professionâls dentri de Union Europeane.

In graciis de colaborazion tra ARLeF e Union Europeane, si podarà sielzi ancje il furlan fra lis lenghis cognossudis.

Di fat, tal sît di Europass - disfueant la liste che si vierç tal barcon "lenghe mari", che e cjape dentri 29 lenghis - si pues selezionâ ancje il furlan. La azion de ARLeF e fâs part dal proget plui ampli dal Portfolio European des Lenghis (PEL), disvilupât dal Program di politiche linguistiche de Union europeane par sostignî il disvilup de autonomie dal student, dal plurilinguism,



de cussience e des competencis interculturâls, in plui che par permeti ai utents di registrâ lis lôr capacitâts e la lôr esperience di aprendiment e di ûs des lenghis, su la fonde dal Cuadri Comun European di Riferiment.

## Suns Europe al torne a Udin

*Il festival european des arts in lenghe minoritarie, proget di ponte de ARLeF tal setôr dal spetacul*

**S**uns Europe, il festival des arts tes lenghis minoritariis de Europe, lûc di incuintri des miôrs produzionis artistichis in lenghe minoritarie su scjale europeane, si davuelzarà ancje chest an a Udin ae fin di Novembar. Pe sô dimension internazionâl e contemporanie, e pe sô maniere di promovî e di meti in rêt a nivel internazionâl lis lenghis mancul pandudis, Suns Europe al jentre tra i projets di ponte finanziâts de ARLeF. Dai 28 ai 30 di Novembar, al sarà un corisi daûr di apontaments che a àn l'obietîf dopli di promovî produzionis artistichis ricercjadis e origjinâls, ma ancje di mostrâ cemût che la diversitât linguistiche in Europe, in plui di jessi une ricjece culturâl e un dirit di fonde, e je une risorse creative inestimabile. Par resonâ su chescj dirits, sui vantaçs e su lis oportunitâts dal plurilinguism, te buinore di sabide ai 30, in graciis de ARLeF, si davuelzarà ancje chest an Scuele Europe, la lezion-conciert pai students de scuelis secundariis di secont grât dal teritori furlan.

Une ocasion uniche, che ogni an e cjape dentri uns 500 students, par

fevelâ de educazion plurilengâl e de citadinance multicultural, acompagnade de musiche dal vîf dai artiscj finaliscj di Suns Europe. Il grant finâl al sarà sabide ai 30 di Novembar tal Teatri Gnûf "Giovanni da Udine", cul concierton che al maravearà il public intune sere fate di musiche, di culturis e di artiscj, a dimostrazion de bielege dal plurilinguism e de modernitât des lenghis minoritariis europeanis. I artiscj a vegnin de Sardegne, dal País Basc, dal Gales, dal Cjanton dai Grisons, des isulis Fær Øer, de Galizie, de Ocitanie francese, dai País Catalans, de Basse Sassonie e, clâr, dal Friûl. Dongje de poie de ARLeF, de Region Autonome F-VJ e de Fondazione Friuli, il Festival al gjolt dal patrocini dal Consei de Europe, dal NPLD - e di tancj sogjets publics e privâts.

Informazions su la pagjine Facebook:

**@SunsEuropeFestival**



**Un gnûf pas indevant pe marilenghe te scuele**

## L'Invalsi al ricognòs il furlan

**L**a lenghe furlane e rive intai lcuisionaris des prossimis provis Invalsi (Istitût nazionâl pe valutazion dal sisteme educatîf di istruzion e di formazion).

Al è chest il risultât de colaborazion, partide cualchi mès indaûr, fra la ARLeF e l'Ent che al valute i aspjets cualitatîfs dal sisteme scolastic talian. Di fat, intune des schermadis proponudis dal Invalsi intes prossimis rilevazions - che, daûr des classis di frecuence, a saran fatis ancje in Friûl-VJ dai 2 di Març ai 23 di Mai dal 2020 - ae domande "A cjase, quale lenghe fevelistu pe plui part dal timp?", si podarà rispuindi ancje "Furlan", sielzintlu dentri di une liste di une ventine di lenghis metudis par ordin alfabetic, colocât tra il francês e il grêc. «Nissun locutôr furlanofon al à plui di cjatâsi in imbaraç devant dal cuesît leât al ûs de sô lenghe - al aferme il diretôr William Cisilino. - La ARLeF e je impegnade ogni dì su chest, e il nestri sfuarç al è daûr a produci i siei risultâts. Al covente che intai ambits principâi dulà che lis lenghis a son un element impuartant, al furlan i sedi garantide la stesse dignitât di chei altris idiomis, in plen spirt european».